

## LE CIRCVIT DV PAIS DE SVAVE.



Eux qui ont parti l'Empire d'Allemagne en ligues, ou cercles (qu'on appelle vulgairement kreis) ont mis ces Svaues en l'ordre quatriéme, car ils en nombrent dix. Svaue (comme il appert par les histoires anciennes) ha jadis esté vn Roiaume, puis apres en ha esté fait vne Duché. Mais aujourd'hui, il n'y ha aucuns des Princes d'Allemagne qui porte le tiltre de la Duché de Svaue, car elle est partie à beaucoup de Princes. Vne partie en appartient par droit hereditaire à la maison d'Austrice. Le Duc de vvirtenbergue en tient vne grande partie. Il y ha beaucoup de villes franches & Imperiales, & beaucoup sont en la subjection du Duc de Baviere. Tous les anciens écriuains ont écrit de ceste gent, comme estant la plus renommée & plus ancienne d'Allemagne. Selon Ptolomeus, Strabo, & autres, il est manifeste qu'elle ha par ci deuant demeuré aupres de la riuere d'Albe & de Svaue; mais aujourd'hui c'est la plus haute partie d'Allemagne, car elle touche aux pieds des Alpes. Les Bauariens, Franconiens, & Allates habitent à l'entour. Ceste region (comme aucuns estiment) ha jadis esté nommée Allemagne, à cause du lac Lemanus.

C'est vn país (ainsi que Ioannes Aubanus escrit très bien en son excellent liuret de la maniere des nations) lequel est en partie plat & vni, & en partie mótaigneux. La terre y est si fertile, qu'elle ne demeure en nul endroit sans estre labourée, excepté ou il y ha des marcz, ou montaignes, ou bois. Il y ha beaucoup de forests, à cause de quoi la chasse y est fort frequentée, & pareillement la volerie: il y croist aussi du blé en abondance, & y ha beaucoup de bestes. Toute la prouince, qui est treffaine, est pleine de villes bien renommées, & de bourgs & chateaux semblablement. Il y ha des forteresses hautes, fort bien munies de Nature & d'artifice. Enuiron les montaignes, elle apporte du fer, de l'argent, & autres metaux. Il y ha grand peuple, fort, hardi, & belliqueux; estimé de Plutarque le plus vaillant de toute l'Allemagne: duquel la gloire ha esté tellement accrué, que par force d'armes il ha conquis l'Empire du monde, & l'ha honorablement tenu par l'espace de cent ans. Ceci raconte Ioannes Aubanus, chez lequel on pourra lire les manieres & coutume de viure de ceste nation.

Auspourg & Vlme sont aujourd'hui les plus renommées villes en icelle. Il y ha encore Kempte, Memmingue, VVerde, Nordlingue, & plusieurs autres qui se trouueront en Munstere. Le Danube, qui est le plus grand fleuue de toute l'Europe, prend ici son commencement, & passe par le milieu du país: lequel estant augmenté de soixante trois riuieres (lesquelles Cuspinian escrit de nombre & de nom hors de Colinitius) tombe en la mer Maieur par six larges entrées, qui sont si grandes (dit Pliné) qu'on dit que la mer en est gagnée quarante mille pas de long, & qu'on en sent le goüst doux.

## LE TERRITOIRE DE BASLE.



Este table contient le país, ou les Rauraciens & Bourguignons de deça la montaigne Iura (qui est S. Glaude) ont eu leur demeure; pareillement le desert des Heluetiens. Les Rauraciens ont jadis (selon le dire de plusieurs) esté compris entre ces riuieres, à sauoir, le Rhin, Byrsa, Arola, & la montaigne qui s'estend depuis Iura, ou S. Glaude, jusqu'ici: maintenant, la plus-part est sous la Iurisdiction de Basle. Il y ha encore vn village aupres du Rhin, vne lieuë loin de la ville de Basle, appellé Augst, qui jadis ha este la ville capitale de ce peuple, & nommé Augusta Rauracorum: mais à present, c'est vn village inconeu. On y void encore plusieurs marques d'anciennes ruines, qui témoignent de son Antiquité. C'est vn país raboteux plein de roches, & empesché de beaucoup de bois; ce nonobstant, bien habité & labouré: tellement qu'ès montaignes aussi, sans les belles prairies qui abondent en patures vtils aux bestes, il est treffertile en bon vin, & grain excellent.

Les Bourguignons susdits souloient s'estendre depuis la montaigne Iura, au S. Glaude, jusqu'au bord du Rhin. Ceste partie se nomme à present Sungou, & Alsate superieure, dont la plus-part est sujette aux Princes d'Austrice.

Brisgou & la Noire-forest (appellée en vulgaire Schwvartzvvald) sont à l'autre coté du Rhin. Ptolomeus met ici Eremus Heluetiorum. Brisgou ha beaucoup de villes & de villages, & est riche en grain. Le menu peuple gaigne presque la vie en labourant aux vignes. Le droit de ceste region est parti entre les Archiducs d'Austrice, & les Marquis de Bades. Voiez de ceci plus amplement en Munstere.